



**Siulersuisut ataatsimiinnerat** ulloq: 6. oktobari 2014

Ullormut oqaluuserisassani nr. 4

**ILISIMATITSISSUT**

## **Kommuneqarfik Sermersuup KANUKOKA-mut ilaasortaaajunnaarniarnerata kingunerisassai pillugit ilisimatitsissut**

### **Suliamik saqqummiussineq:**

Allakkiaq una Kommuneqarfik Sermersuup KANUKOKA-miit ilaasortaaajunnaarnarata imaali-innarluni kingunerisinnaasai pillugit naliliinerugallarpoq. Naliliineq una malitseqartinneqassaaq ersarinnersumik misissuineramik, ilaasortaaajunnaarnerup kingunerisassai pillugit, aamma aallartitat ataatsimiinnermini siulersuisullu qanoq ittunik tamatumunnga atatillugu isumaliutersuuteqartari-aqarnersut pillugit.

Kingunerisassai pillugit nalilersuineq kattuffiup malittarisassaanik aalajangersakkanillu allanik tunngavilimmik aallaaveqartinneqassaaq. Soorlu ataani allaaserineqartoq kattuffiup malittarisassai annertunerusunik aalajangersagartaqanngillat kommunip ilaasortaaajunnaarneranut atatillugu qanoq periaaseqartoqassanersoq pillugu.

### **1) *Ilaasortaaajunnaarneq qaqugumiit atortuulissava?***

KANUKOKA-p malittarisassani § 2, imm. 2 naapertorlugu kattuffimmiit ilaasortaaajunnaarneq pissaaq allakkatigut siulersuisunut nalunaaruteqarnikkut ukiumik ataatsimik sioqqutsisumik ukiup naatsorsuuseriffiusup naannginnerani. Tassa imaappoq ilaasortaaajunnaarneq inatsisitigut aatsaat 2015-ip naanerani atortuulissaaq, tamannalu ilaatigut isumaqarluni Kommuneqarfik Sermersooq 2015-imi nalinginnaasumik ilaasortaanerminut akiliuteqassasoq.

Taamaattumillu Kommuneqarfik Sermersooq 2015-ip naanera tikillugu kattuffimmi tamakkiisumik ilaasortaassaaq, taamalu piffissap pineqartup tunngaanut tamakkiisumik siulersuisuni ilaasortaassalluni, siulersuisullu sulineranni peqataalluni, KANUKOKA-milu fagitigut siunnersortinit siunnersorneqarnermik il.il. atuisinnaalluni.

Kisiannili pissusiviusut imaapput kommunip nammineq aalajangertussaallugu kommuni qanoq annertutigisumik kattuffiup sulineranni peqataaniarnersoq, tassani aamma siulersuisut sulineranni, 2015-ip naanissaata tungaanut, sorluttaaq kommunip nammineq aalajangissagaa fagitigut siunnersortinit siunnersuineramik atuiniarnerluni imaluunniit naamik.

### **2) *Kommuneqarfik Sermersooq ilaasortaaajunnaareeruni katuffimmut piumasaqaateqarsinnaava?***

Malittarisassani § 2, imm. 2-mi imaattumik allassimasoqarpoq: ”Kattuffimmit tunuarnermi kommune tunuartoq Kattuffimmit piumasaqaateqarsinnaanngilaq”. Januaarip aal-

laqqaataa 2016 aallarnerfigalugu Kommuneqarfik Sermersooq taamaasilluni assersuutigalugu kattuffiup pigisaanik piumasaqaateqarsinnaajunnaassaaq, tamatumunnga ilanngullugit pigisanik nalilinnik tuniniaasoqassagaluarpat. Aamma kommuni kattuffimmiit tunuarnermini KANUKOKA-p pigisaanik nalilinnit naleqquttumik annertussusilinnik pissarsiaqarnissaminut piumasaqaateqarsinnaajunnaassaaq. Tamatuma illuatungaani aamma kommuni 2016-imi januaarip aallaqqaataata kingorna kattuffiup amigartoorutigisimasinnaasaanut pisussaaffeerutissaaq.

**3) *KANUKOKA ilaasortaajunnaartoqareerneratigut kattuffittut ingerlaannarsinnaava?***

Aap, akornutissaqanngilaq, kisianni qanoq iluseqarluni aamma qanoq taaguuteqarluni il.il. kommuninut ilaasortaasunut pingasunut aalajangigasanngussaaq. Qanoq iluseqarnissaannut tunngatillugu pineqartut ilaatigut tassapput politikikkut aqqissuussaaneq qanoq ittoq siunissami atorneqassanersoq, tamatumunnga ilanngullugu kattuffik suli aallartitat ataatsimiittarnerannik qullersaasumik ilaqassanersoq, aamma suli siulersuisoqassanersoq kattuffiup ingerlanneqarnerani aqutsisuusunik, kiisalu aallartitat ataatsimiittarnerat siulersuisoqarnerlu qanoq katitsigaassanersut, tamatumani aamma aallartitat qassit aamma siulersuisunut ilaasortat qassit.

Iluseq qanoq ittoq atorneqassanersoq pineqarmat eqqarsaatigineqarpoq suliassat qanoq ittut siunissami kattuffiup isumagisarissanerai, tamatumani aamma allattoqarfiup suliassat suut sularisassanerai. Uanilu pingaaruteqarpoq tikkuassallugu Kommuneqarfik Sermersuup ilaasortaajunnaarnera kattuffimmut ilaasortaanermut akiliutaasartut 40 %-ingajammik annikinruleranerannik kinguneqassammat, oqartussaasullu aalajangiisartut taamaattumik isummerfigisariaqarpaat tamanna qanoq iliornissamik kinguneqassanersoq.

**4) *Ilaasortaajunnaareernermi Kommuneqarfik Sermersuumiit aallartitat qinikkat ingerlaannarsinnaappat?***

Malittarisassat isummerfiginngilaat kommunip ilaasortaasup KANUKOKA-mit ilaasortaajunnaarnera, aammalu aallartitat kommunalbestyrelsimit ilaasortaajunnaarsimasumit qinikkat qanoq pineqassanersut.

Malittarisassani § 5, imm. 3 naapertorlugu aallartitanik taaseqataasinnaasunik taakkualu sinniisussaannik kommunalbestyrelsimi pineqartumi ilaasortaasunik taamaallaat qinersisoqarsinnaavoq, aammalu malittarisassani § 5, imm. 2 naapertorlugu aallartitanik qinersineq piffissamut kommunalbestyrelsip qinigaaffianut atuuttarpoq. Kommunilli ilaasortaajunnaarneratigut pissusissamisoorumik tamatuma kingunerissavaa Kommuneqarfik Sermersuumi kommunalbestyrelsimiit qinikkat aallartitatut inissisimajunnaarnissaat, taamaattumillu 2015-ip naaneraniit aallartitat katersuuttarneranni ilaajunnaarnissaat.

**5) *Kommuninit pingasuniit aallartitat ilaasortaajunnaartoqareernerani ingerlaannarsinnaappat?***

Aap, Qaasuitsup Kommunianiit, Qeqqata Kommunianiit aamma Kommuni Kujallermiit aallartitat sinniisussallu kommuniminniit 2017-ip tunngaanut qinigaagamik aallartitatut ingerlaannarsinnaassapput, aamma januaarip aallaqqaataata 2016-ip kingorna, Kommuneqarfik Sermersuup ilaasortaajunnaarnerata atortuulernerani. Malittarisassani § 5, imm. 2-mi taamaasilluni ersippoq aallartitanik qinersineq piffissamut kommunalbestyrelsip qinigaaffianut atoruuusoq.

Akornutissaqartutut isikkoqanngilaq kommunit ilaasortaasut kattuffiup ingerlanneqarneranut ilutsimik ullumikkut periaasiusumiit allaanerusumik toqqaasinnaanerat. Assersuutigalugu aallartitat ataatsimiinnerat taannaasariaqanngilaq kattuffiup ingerlanneqarnerani oqartussaasut qullersaat.

Kattuffiup ingerlanneqarnerani allanngortitsisoqassappat allannguutaasussaasinnaasut malittarisassanik allanngortitsisoqarnissaanik piumasaqarfiupput, tamannalu taamaallaat aallartitat (immikkut ittumik) ataatsimiinnerisigut minnerpaamik taaseqataasinnaasut 2/3-iisa taasinerisigut pisinnaavoq.

**6) Siulersuisunut ilaasortatut qinikkat ilaasortaajunnaartoqareernerani ingerlaannarsinnaappat?**

Malittarisassat apeqqummut tamatumunnga aamma isumminngillat, tassami malittarisassani aalajangersagaqanngimmat kommuni ilaasortaasooq ilaasortaajunnaarpat qanoq iliortoqarnissaa pillugu.

2015-ip naanerata tungaanut siulersuisuni ilaasortatut qinigaasimasut qularutissaanngitsumik siulersuisuni ingerlaannarsinnaapput.

Januaarip aallaqqaataata 2016-ip kingorna: Malittarisassani § 6, imm. 6 naapertorlugu piffissaq qinigaaffiusooq naatsorsorneqartarpoq ullormiit aallartitat ataatsimiinnerminni siulersuisunut qinersineranniit (tamanna pivoq juni qaammat 2013), tullianilu aallartitat ataatsimiinnerminni siulersuisunut ilaasortassanik qinersinissaasa tungaannut. Aalajangersagaq taanna oqarpoq siulersuisuni ilaasortat kommuninit ilaasortaasunit pingasuniit qinigaasut 2017-ip tungaanut issiaannarsinnaasut. Kisiannili illuatungaaticigut illuanut sammisumik oqariartuu-teqarpoq uani immikkut ittumik pisoqarfiusumi, kommunip ilaasortaasup ilaasortaajunnaarnerani.

Malittarisassani § 6, imm. 1 naapertorlugu siulersuisut qulingiluanik ilaasortaqarput, siulittaasooq ilanngullugu. Kiisalu ersippoq kommunit ilaasortaasut sisamat borgmesterii siulersuisuni inunnguuseralugu ilaasortaasut aammalu aallartitat ataatsimiinnerminni siulersuisuni ilaasortassat sinneri toqqartaraat.

Malittarisassani toqqaannartumik eqqaaneqarmat borgmesterit sisamaasut siulersuisuni inunnguuseralugu ilaasortaasut, siulersuisunilu ilaasortat sinneri aallartitat ataatsimiinnerminni qinertarmatigit, taakkunanilu Kommuneqarfik Sermersuumiit aallartitat 1. januar 2016-ip kingorna ingerlaqqittussaannngimmata nalilernerqarpoq nalorninaateqartoq maanna siulersuisuusut 1. januar 2016-ip kingorna ingerlaannarsinnaanerata, qinigaaffiup 2017-imi naanissaata tungaanut. Maanna siulersuisuusut toqqammaviat amerlassusaallu taamaasilluni 1. januar 2015-ip kingorna tammassaaq, soorluttaaq siulersuisut aallartitanit tamarmiusunit pisussaaffiligaasutut isigineqarsinnaajunnaassasut, ullup pineqartup kingorna.

Akornutissaqarsorinangilaq aallartitat ataatsimiinnerminni, - maanna pissutsit immikkut ittut atunneranni – (malittarisassani aalajangersaavigineqarsimannngitsumi) – aalajangissappata siulersuisunik nutaanik qinersisoqartariaqartoq, siulersuisut suliaasaannik isumaginnittussanik 2017-imi kommunalbestyrelsinit qinersisoqarnissaata tungaanut. Tamannalu tunngaviaticigut sukkulluunniit pisinnaavoq, - 1. januar 2016 sioqqullugu kingornaticigulluunniit.

Siulersuisut pineqartut nutaat malittarisassat naapertorlugit aallartitanit qinerneqassapput. Aallartitat ataatsimiinnerat 1. januar 2016 sioqqullugu pissappat, taava aallartitat Kommuneqarfik Sermersuumiit qinigaasut peqataaqqullugit qaaqquneqassapput.

**7) *Siulersuisut siulittaasuat ilaasortaajunnaartoqareernerani ingerlaannarsinnaava?***

2015-ip naanissaata tunngaanut akornutissaqarsorinanngilaq siulittaasup siulittaasutut ingerlaannarsinnaanera.

2016-imi januaarip aallaqqaataata kingorna: Malittarisassat aamma ajornartorsiummut matumunnga aalajangersagartaqanngillat, malittarisassani aalajangersaasoqanngimmat kommuni ilaasortaasooq ilaasortaajunnaarpat, siulittaasorlu kommunimi tunuartumi kommunalbestyrelsimit ilaasortaappat qanoq periaaseqartoqassanersoq pillugu.

Malittarisassani § 6, imm. 1 naapertorlugu siulittaasooq aallartitat ataatsimiinnerminni qinertarpaat. § 6, imm. 2 naapertorlugu siulittaasumik qinersinissamut kommunalbestyrelsimut ilaasortamik inassuteqartoqarsinnaavoq, § 6 imm. 5-ilu naapertorlugu siulersuisuni ilaasortassatut kiisalu taakkununga sinniisussatut kommunini ilaasortaasuni kommunalbestyrelsinut ilaasortat qinerneqarsinnaapput. Aalajangersakkat taakkua tikkuarpaat siulittaasooq 2016-imi januaarip aallaqqaataata kingorna ingerlaqqissinnaanngitsoq, tamanna siuliani pineqartumi aalajangersakkanik tunngaveqassammat, - aammalu kattuffiup aaqqissuussaanera tamaat eqqarsaatigigaanni, - kommunit peqatigiiffigisaanni siulittaasuusoqarsinnaanngimmat, pineqartoq kommunalbestyrelsimi kattuffimmiit ilaasortaajunaartumi ilaasortaappat.

**8) *Siulittaasup siulittaasutut atorfini januaarip aallaqqaataa 2016 sioqqullugu qimassinnaavaa?***

Malittarisassani § 6, imm. 6 naapertorlugu siulittaasooq siulersuisunilu ilaasortat sinneri qinerneqartarput piffissamut aallartitat ataatsimiinnerminni siulersuisunut qinersineranniit naatsororneqartumik, qinigaaffillu ingerlassalluni tulliani ileqquusumik aallartitat ataatsimiinnerminni siulersuisuni ilaasortassanik qinersinissaasa tunngaannut atuuttumik.

Malittarisassani aalajangersakkamik immikkut taasisoqarpoq, siulittaasup tunuartariaqarlernissaanik kinguneqartussamik, siulittaasooq Inatsisartuni, Naalakkersuisuni imaluunniit folketingimi ilaasortanngorsimaguni tunuartariaqalissammat. Kiisalu § 6, imm. 8-mi eqqaaneqarpoq siulittaasooq piffissami sivisuumi suliaminik ingerlatsisinnaanngikkuni (paasiuk napparsimanermi sivisuumi, nunani allani najugaqarnermi il.il.), siulittaasup tulliaata siulittaasutut inis-simasussaanaera, siulittaasumik nutaamik siulersuisut qinnuteqarnerat tunngavigalugu aallartitat ataatsimiinnerminni qinersinissaasa tunngaannut.

Malittarisassani aalajangersagaqanngilaq periarfissaqartoq siulittaasup atorfimminit tunuarsinnaaneranut, pissutsit siuliani pineqartut pineqarsimanngippata, (Inatsisartuni il.il. ilaasortanngornikkut il.il. piffissamiluunniit sivisuumi suliaminik isumaginnissinnaanngikkuni), kisiannili taamaakkaluartoq periarfissaasariaqarpoq siulittaasup piffissami qinigaaffimmi tunuarsinnaanera, pissutissaasumik tunngavilersorneqarsinnaasumik peqquteqartil-lugu. Periarfissaq alla immaqqa tassaasinnaavoq siulittaasup aallartitat ataatsimiinnissaasa tunngaannut sulinnigiffeqarallarnissamik qinnuteqarsinnaanera, tassani nutaamik siulittaasumik qinersisoqassammat (periarfissaq alla sulinnigiffeqarnissamik 2015-ip naanerata tunngaa-

nut qinnuteqarneq, siulittaasup kommuniata kattuffimmiit ilaasortaajunnaarfiani), naak malittarisassani allassimasoqanngikkaluartoq taamatut sulinngiffeqarnissamut qinnuteqartoqarsinnaanera.

Taamaattoqartillugu siulittaasup tullia siulittaasuugallassaaq, aallartitat ataatsimiinnerminni siulittaasussamik nutaamik qinersinissaasa tunngaannut.

Soorlu siuliani eqqaaneqartoq aallartitat ataatsimiinnerminni siulittaasumik qinersisarput, tamatumalu aallartitat pisussaatisinnaavai siulittaasup siulittaasutut qinigaaffimminik qimatsinissaanut akuersisuunissaannik. Kisiannili aamma periarfissaasariaqarpoq siulittaasup nammineq siulersuisunut nalunaaruteqarsinnaanera, tunuarnissamik kissaateqarnerminik, -sulinngiffeqarnissamilluunniit qinnuteqarsinnaanera, -tigussaasunik tunngavilersuuteqarluni, taavalu siulersuisut siulittaasup kissaataa tusaatissatut tigussagaat. Tamatumunnga atatillugu malittarisassani § 6, imm. 8-mitulli inissisimasoqartariaqarpoq, tassani ersimmat: ”Siulittaasoq sivisunerusumik pisinnaajunnaarpat, siulittaasup tullia inaanut inississaaq, siulittaasumik nutaamik qinersisoqarnissaanik siulersuisut piunasaqarnerat tunngavigalugu aallartitat ataatsimiinnerminni qinersinissaasa tunngaannut”.

Taamaasilluni periarfissaasariaqarpoq siulittaasup siulittaasutut atorfimminik taamaatitsinnaanera, siulittaasullu tulliaata siulittaasutut inississinnaanera, siulittaasumik nutaamik (immikkut ittumik) aallartitat ataatsimiinneranni qinersisoqarnissaata tunngaannut.

**9) *Siulittaasup immaqqa siulittaasutut atorfimminik januaarip aallaqqaataa 2016 sioqqullugu qimatsinissaanera.***

Siulianisulli taamaattoqartillugu § 6, imm. 8-mi pineqartutut periaaseqartoqassaaq, tassalu siulittaasup tullia siulleq siulittaasumik taarsiissaaq, siulittaasumik nutaamik aallartitat ataatsimiinnerminni toqqaasinnaalernissaasa tunngaannut.

Malittarisassani § 6, imm. 4 naapertorlugu aallartitat ataatsimiinnerminni siulersuisunut ilaasortat qinikkatut aamma siulittaasup siulersuisuni ilaasortatut sinniisussaannik qinersisarput. Tamanna isumaqarpoq, siulersuisunik nutaanik qinersisoqarnissaata tunngaannut, siulittaasumik nutaamik qinersineq ilanngullugu, -aallartitat ataatsimiinneranni, -siulersuisut ataatsimiinnissaannut, -aallartitat ataatsimeereernissaasa tunngaannut, siulittaasup inuttut nammineq sinniisussaa ataatsimiigiaqqullugu qaaqquneqartassasoq, siulersuisuni ilaasortaannartut ataatsimeeqataasussatut, siulersuisunut nutaanik ilaasortassanik qinersisoqareernissaata tungaannut. Taamaasilluni suli siulersuisuni ilaasortat amerlassusissaminnik amerlassuseqassapput, siulittaasup tunuanninnerani amerlassusiusut amerlaqataannik.

**10) *Kommuneqarfik Sermersuup ilaasortaajunnaanera malittarisassat allannngortinneqarnissaannik kinguneqassava?***

Aap, taamatut isumaqartariaqassaaq. Malittarisassani tunngaviuvoq kattuffimmi kommunit sisamaanerat. Assersuutigalugu § 5, imm. 1-imi ersippoq una ”kommunit sisamaasut borgmesterii sisamaasut aallartitatut katersuuttartunut aalajangersimasumik ilaasortaapput”, aamma § 6, imm. 1-imi ersippoq ”Kommunit ilaasortaasut borgmesterii sisamat siulersuisunut aalajangersimasumik ilaasortaapput”. Tamatuma saniatigut malittarisassani allanik aalajangersagaqarpoq ersersitsisunik kommunit sisamaasut tamarmik katuffimmut ilaasortaasut.

Ataatsimut isigalugu pissusissamisuussaaq nutaamik aallareriassalluni, aamma malittarisassat qanoq imaqqarnissaat eqqarsaatigalugu, taamalu taakkunuunatigut pissusiulersut nutaat

ersersillugit, soorlutaaq malittarisassat imaqartariaqartut aalajangersakkanik, siunissami kattuffiup qanoq aaqqissuunnissaanut tunngasunik, aamma kikkut qanoq pisinnaatitaanersut eqqarsaatigalugit.

Malittarisassanut allannguutit aallartitat katersuuttartut ataatsimiinneranni immikkut ittumi suliarineqartariaqarput, taannalu ingerlanneqartariaqarluni malittarisassat nutaat januaarip aallaqqaataani 2016, imaluunniit taassuma kinguninngua atortuulersinnaanngorlugit. Immikkut ittumik aallartitat ataatsimeersuarnerat katersuulluni ataatsimiinnertut ingerlanneqarsinnaavoq, imaluunniit videokonference-tut / oqarasuaatikkut ataatsimiinnertut. Malittarisassani maanna atuuttuni piumasarineqartutut isikkoqanngilaq aallartitat katersuullutik ataatsimiittarnerisa naapilluni ataatsimiinnertut pinngitsoorani ingerlanneqartarnissaat. Kisiannili aamma tunngavilersuutissaqarluarsinnaavoq taamatut ataatsimiinnerup pineqartup naapilluni ingerlanneqarnissaata pisariaqarneranut, tamatumani ilaallutik oqaluuserisassani sammisassaqarnera pingaaruteqartunik, - tassani ilaalluni kattuffiup siunissaa, - taamalu naapilluni oqaloqatigiinnissamut tamanna tikkuussisuusinnaalluni.

**11) *Ilaasortaajunnaarneq KANUKOKA-p inatsisit naapertorlugit isumaqatigiinniar-tarnerni illuatungiusarneranut aamma siunnersuisoqatigiinni ataatsimiititalianilu assigiinngitsuni ilaasarneranut sunniuteqassava?***

Aqutsinermut inatsimmi § 68-imi imaattunik allassimasoqarpoq: ”Kommunimi sulisut nalin-ginnaasumik akissarsiaqartitaaneranut, atorfeqartitaaneranut, soraarnerussutisiaqartitaaneri- nullu aalajangersakkat, tjenestemandit pillugit inatsisini tamakku aalajangersarneqarsimatina- git, Naalakkersuisut aamma Kalaallit Nunaanni Kommunit Kattuffiata akunneranni isuma- qatigiissutit aqputigalugit imaluunniit isumaqatigiissuteqareernerisigut aalajangersarneqas- sapput.” Tamanna isumaqarpoq kommunini akissarsiaqartitsinerup aaqqissuunneqarnera Namminersorlutik Oqartussat KANUKOKA-llu isumaqatigiinniareernerisigut aalajangersaa- vigineqartassasoq. Kommuneqarfik Sermersuup ilaasortaajunnaarnerata allanngortinngilaa KANUKOKA-p kommunit sinnerlugit isumaqatigiinniartartuunera, aqutsinermut inatsisip qaqugukkuunersoq allanngortinneqarsinnaanerata tunngaanut.

Inatsisini assigiinngitsuni nalunaarutinilu aalajangersakkat naapertorlugit KANUKOKA-p toqqartarpai / inassutigisarpai siunnersuisoqatigiinni ataatsimiititalianilu assigiinngitsuni ilaa- sortassat (assersuutigalugu Qinigaasinnaanermut ataatsimiititaliaq, Nakutilliisoqatigiit, Ineqarnermut maalaaruteqarnermut ataatsimiititaliaq, Unammilleqatigiinnermut ataatsimiiti- taliaq, ataasiakkaannguit eqqaaginnarlugit). Ilaasortaajunnaartoqareernerata kingorna, tamanna 1. januar 2016-imi atortuulersinneqareerpat, suli KANUKOKA-p toqqartassavai / inassuteqaa-tigisassavai siunnersuisoqatigiinni ataatsimiititalianilu assigiinngitsuni sinniisu- usussat, qaqu-gukkuunersoq inatsisini nalunaarutinilu pineqartuni allannguuteqartitsiso- qarsinnaanera sioqqullugu.

**12) *Ilaasortaajunnaarneq KANUKOKA-p suliassaqarfinni assigiinngitsuni ataqatigiis- saarisutut inissisimaneranut kinguneqassava, tamatumani aamma Namminersorlutik Oqartussat tunngaannut?***

Aningaasanut inatsimmi oqaasertani ersippoq Naalakkersuisut aamma KANUKOKA ukiumoortumik kommuninut ataatsimoortumik tapiissutissanik isumaqatigiinniartar- tuusut. Naatsorsuutigineqarporlu ataqatigiissaarisutut KANUKOKA-p tamatumani inis- sisimanagera attatiinnarneqassasoq.

Aamma suliassaqarfinni allani pingaaruteqartuni KANUKOKA ataqatigiissarisutut inissisimavoq, tamakkununga ilaalluni KANUKOKA-p ataqatigiissarisuunera ”Namminersolutik Oqartussat aamma kommunit suleqatigiinnerat pillugu nalilersuinerup nassuiaatsip” atortuulersikkiartornerani, tassani ilaallutik aaqqissuusseqqinnerup nalilersorneqarnera. Taanna ataqatigiissarisutut inissisimaneq KANUKOKA-p tigungmiinnassagaa naatsorsuutigineqarpoq.

**Ilanngussaq:**

Ilanngussaqaanngilaq.